



Komiuniti risos manejmen

Wan **risos** hemi wan samting we hemi gat valiu mo ol pipol oli yusum. Ol risos blong solwota oli inkludim fis, selfis mo ol nara laef blong solwota. Olgeta risos ia mo wea ples oli stap long hem (envaeromen blong olgeta) oli pat blong **ecosistem** we ol samting we i laef o oli no laef i gat aktiviti bitwin long olgeta.



Men eim blong **manejen blong ol risos blong solwota** hemi blong mekem sua se yus blong ol risos ia i sastenebol. Hemia i minim se yumi mas manejem ol aktiviti blong yumi blong protektem envaeromen, long graon mo long solwota. Wanem i gohed long graon i afektem ol samting we i stap laef long solwota. Forestri, ol fam, ol maen, developmen we oli no kontrolem mo ol rabis blong taon mo vilej i afektem ol ekosistem blong solwota mo ol spisis blong solwota we yumi stap kakae olgeta.

Nid ia blong manejen tugeta graon mo solwota samtaem oli kolem hem wan ridge to reef approach (aproj blong rij go kasem rif) o wan ekosistem aproj. Ekosistem aproj blong manejen hemi wan stael blong manejen risos we hemi mo waed, we hemi inkludim manejen blong graon, wota mo ol samting we i laef, we liflet ia i stap tokbaot.

Wan komiuniti we hemi gat strong lida hemi save developem risos manejen hem wan we i no nidim help i kam long aotsaed. Be komiuniti wetem ol otoriti blong gavman o NGO we oli wok tugeta (samtaem oli kolem **co-management**) i save mekem proses ia i mo isi mo mo efektif.



Ol samting we i mas gat long saed blong komuniti manajemen blong ol risos blong solwota i stap daon.

1. Mekem sua se komuniti i luksave, i gat konsen mo i hapi blong mekem sam samting

Wan komuniti i mas luksave valiu blong ol risos blong solwota blong hem mo **gat konsen** long ol problem we oli stap finis. Hemi mas rere blong **tekem ol aksen** we oli nidim blong manajemen ol risos blong solwota blong hem; hemi mas rere blong wok wetem gavman sapos ol problem i aotsaed long kontrol blong olgeta.

Sapos i no olsem, i minim se co-managemen bae i feil. Olsem namba wan grup we i gat konsen (key stakeholder), komuniti i mas lid blong mekem proses ia i wok.

Yu mas luk sapos komuniti i rere raet long stat – long fas miting blong ol komuniti lida.

- Sapos yu luk se oli no rere, i mo gud sapos yu givim sapot long wan nara komuniti we i wantem gohed.
- Sapos yu luk se oli rere, yu sud tokbaot fasin blong developem co-management mo givim opotuniti long ol memba blong komuniti blong askem kwestin. Afta, gohed wetem ol step we i stap, olsem:



2. Agri long ol namba wan gol –ol risal we oli wantem

Komuniti hem wan i mas setem ol gol, no mata we oli bin developem olgeta wetem advaes blong wan fasiliteta. Wan eksampol blong wan smol be impoten gol maet hemi *“blong mekem sua se ol fis we mifala i kasem i inaf blong fidim komuniti blong yumi”*.

Wan gol we i bigwan lelebet maet hemi *“blong manajemen graon, wota mo ol samting we i laef blong provaedem kakae mo ol nara risos blong komuniti nao mo long fiujd”*.

Komuniti i mas agri long gol, o olgeta gol, mo oli mas go stret wetem ol nasonal polisi. I gud sapos oli save tokbaot ol gol wetem ol dipatmen blong gavman olsem fiseris o envaeromen, mo oli sud invaetem olgeta ofisa long ol dipatmen ia blong kam long ol eli miting wetem komuniti.

3. Agri long wan manajemen plan wetem ol aksen o step we oli nidim blong ajivim ol gol ia.

No mata we proses i difren long ol difren kaontri, wan komon tingting we i mas stap, hemia blong mekem sua se **komuniti i involv bigwan**.

I impoten blong involvem ol difren grup blong komuniti, inkludim ol grup blong ol woman, ol jif, ol hed blong famli, olgeta we oli holem graon, olgeta we oli gat raet long hem, mo ol grup blong fisa blong mekem sua se evri pat blong komuniti i involv. Tu, taem ia nao blong tokbaot ol aksen mo rul blong komuniti we oli nidim blong ajivim ol gol.

I impoten tumas blong enkarejem ol pipol blong tokbaot ol problem blong olgeta (we i rilet long ol namba wan gol) mo blong proposem ol ansa. Ol infomesen we oli save yusum hemi tradisonel save long saed ia mo ol infomesen blong saens (luk long ol pepa blong toksave).

I gat plante wei we yu save enkarejem ol pipol blong joen long ol toktok we i inkludim ol aksen (drama), rol plei, risos mapping, mo tu yu save yusum ol teknik blong involvem olgeta olsem constructing problem/solution trees mo ol nara wan (Constructing problem/solution trees mo LMMA teknik oli diskraebem olgeta long 2010 SPC/FAO pablikesen *“A community-based ecosystem approach to fisheries management, guidelines for Pacifi Island Countries”*)

Men aotkam blong ol miting i mas gat wan agrimen long ol problem mo ol solusen bifo oli disaed long ol aksen we oli mas tekem mo hu nao hemi risponsibol blong karem aot olgeta. Olgeta oli save rikodem hem olsem wan aksen plan o wan **Komuniti Risos Manajemen Plan**. Plan ia, we oli raetem long lokol lanwis, hemi wan impoten dokiumen blong olgeta i no save fogetem ol agrimen mo ol rul, mo tu blong soem long ol man aotsaed.



4. Aedentifaem o setemap wan smol grup blong mekem manejen plan ia i wok

No mata we evri pipol blong wan komiuniti i sud sapotem komiuniti risos manejen, i gat nid blong gat wan smol grup blong stap risponsibol long ol aksen we i stap long plan. Maet oli tingbaot grup olsem wan komiti we wok blong hem i blong lukluk long ol aksen mo folem progres. Maet smol komiti ia i gat nid tu blong panisim olgeta we oli brekem ol rul blong manejen.

Maet komiuniti i save yusum wan grup we i stap finis o maet i setemap wan **Komiuniti Risos Manejen Komiti**. Ol memba blong komiti maet i ol kastom lida, o ol pipol we oli jusum olgeta, o maet ol pipol oli save elektem ol memba. Komiti tu i mas inkludim ol representatif blong ol grup blong woman mo grup blong ol fisa. Sapos i posibol, komiti ia i sud inkludim representatif blong ol ko-maneja, maet blong gavman o maet blong NGO. Ol memba ia i mas mit evri taem mo wok had blong kipim komiuniti risos manejen i gohed gud.

5. Mekem! – mekem ol aksen we i stap long manejen plan

Ol komiuniti maneja oli yusum ol aksen, ol rul o **tul** blong ajivim wan gol. Blong givim wan eksampol, maet komiuniti i jus blong putum wan ban blong no kasem ol fis we oli stap spawn mo putum wan ban blong no yusum sam kaen fasin blong fising we i stap spoelem ol fis.

Blong protektem ol ekosistem blong solwota maet oli disaed blong planem ol tri raon long riva we i stap klosap blong preventem erosen, blong protektem eria blong natongtong, mo blong protektem wan eria blong korel rif taem oli setemap wan **Marine Protected Area**.

Hemia i sam eksampol blong ol tul we oli save yusum – yu save yusum ol difren wan blong ajivim sem mak gol.



6. Jek blong luk se oli karemaot ol aksen

Yu mas folem wok blong komiuniti risos manejen mo luk long hao hemi stap wok. Yu mas luk blong faenem ansa long ol kwesten olsem:

- Komiuniti Risos Manejen Komiti hemi stap miting evri taem?
- Hemi gat sapot blong komiuniti lida? - jioj? - ol pipol?
- Ol pipol oli respektem ol rul we komiti i bin mekem?
- Komiti hemi enfosem ol rul we ol pipol oli agri long hem?

7. Luk sapos plan i stap wok

Yu mas folem mo luk sapos ol aksen mo ol tul oli ajivim (sapos no yet, mekem progres i go long) ol gol we oli bin disaed long olgeta. Sapos samting ia i no olsem, yu mas mekem sam difren aksen.

- Tabu eria i stap wok? Namba blong fis i go antap?
- Ban long no fis wetem net hemi mekem namba blong fis i go antap?
- Ban long no kasem sam kaen spisis i mekem namba blong fis i go antap?
- Namba blong fis we oli stap kasem i go antap, o i no go daon tumas?

Sapos ol manejen mesa we yu tekem oli no wok, yu mas tekem sam nara mesa. Proses ia yumi kalem **adaptive management** – minim se yu traem fastaem sam mesa blong manejen we yu luk se i stret, afta yu luk sapos oli wok; sapos no, yu mas jenisim olgeta smol, o putum sam difren mesa.



Sapot we i gohed

Tingting i olsem: sapos komiuniti i stap manejen ol risos blong hem mo i gat ol benefit we olgeta oli save lukim olgeta, komiuniti manejen i save gohed hem wan. Be maet ol komiuniti i faenem se i gud sapos oli save gohed long ol yia we i kam blong toktok wetem ol nara oganaesesen aotsaed long komiuniti.

Sapos wan nara oganaesesen hemi involv, maet i tekem plante yia blong ol visit i go long komiuniti evri taem blong mekem sua se ko-manejen i stap gohed. I mo gud blong luk long wan wei we sapot blong aotsaed i save gohed blong go daon smolmol, from i nogud sapos sapot mo enkarejen long komiuniti i finis kiwkaem olgeta.

Blong ekstendem komiuniti risos manejen i go long ol nara komiuniti

Blong seraotem ol benefit igo long ol nara komiuniti, ol ko-maneja o oganaesesen we i stap olsem pat blong program ia i mas mekem sua se i gat plante ripot tru long midia long fasfala fising komiuniti we i bin setemap komiuniti bes risos manejen.

Ol intaviu long redio wetem ol lida long fes vilej oli wan gud wei i blong kasem intres blong sam nara komiuniti. Sapos i gat sam smol fanding istap, maet i gud blong oganaesem ol visit bitwin long olgeta komiuniti we oli praktisim risos manejen wetem ol komiuniti we oli intres blong mekem olsem; hemia i wan namba wan wei blong seraotem program ia.

No mata wanem kaen loa i stap we gavman i traem mekem ol man i folem, risponsibol manejen blong ol risos blong solwota i save gohed gud sapos olgeta fising komiuniti olgeta nomo oli luk se i risponsibiliti blong olgeta.

http://www.spc.int/DigitalLibrary/Doc/FAME/Manuals/Anon_10_EAFguidelines.pdf



Pacific
Community
Communauté
du Pacifique

COMMUNAUTÉ DU PACIFIQUE
BP D5 • 98848 NOUMÉA CEDEX
NOUVELLE-CALÉDONIE
Téléphone: +687 26 20 00
Fax: +687 26 38 18
Courriel: spc@spc.int
<http://www.spc.int>

The Locally-Managed Marine Area (LMMA) Network



Improving the practice of marine conservation

LMMA Network
Courriel: info@lmmanetwork.org
<http://www.lmmanetwork.org>



UNION EUROPÉENNE

Liflet ia Michael King hemi bin raetem wetem infomesen mo komen i kam long Michael King with information and comments supplied by Mike Batty, Lindsay Chapman, Ian Bertram, Hugh Govan, Simon Albert, Etuati Ropeti, Being Yeeting, Kalo Pakoa, Aymeric Desurmont, Maria Sapatu, Jeff Kinch, Simon Foale, Ron Vave, Toni Parras, Jovelyn Cleofe, Alifereti Tawake, Wendy Tan, Stacy Jupiter, Pip Cohen, Tom Brewer, Tevi Maltali, James Comley, Victor Bonito, Magali Verducci, Julien Grignon, Semisi Meo and Michael Guilbeaux.

